

Raja Zarith Sofiah Pro-Canselor UTM

JOHOR BAHRU: Isteri Tunku Mahkota Johor, Raja Zarith Sofiah dilantik sebagai Pro-Canselor Universiti Teknologi Malaysia (UTM) yang baru menggantikan Tun Dr Mohamed Zahir Ismail.

Naib Canselor UTM, Prof Datuk Mohd Zulkifli Ghazali, berkata perisytiharan pelantikan itu akan dibuat pada sesi pertama majlis konvokesyen UTM ke-30 di kampus Skudai, Sabtu ini.

Canselor UTM, Sultanah Johor berkenan dengan pelantikan Raja Zarith Sofiah bagi menggantikan Mohamed

Zahir yang juga Speaker Dewan Rakyat, yang melepaskan jawatan mulai 21 Ogos lalu, katanya pada sidang akhbar di Skudai, semalam.

Raja Zarith Sofiah adalah anakanda kepada Almarhum Sultan Perak, Sultan Idris Shah.

Baginda memiliki Ijazah Kepujian Pengajian Bahasa Cina dari Kolej Somerville, Universiti Oxford dan fasih bertutur dalam bahasa Perancis dan Itali.

Seperti ayahnya, Raja Zarith Sofiah juga menggemari bidang lukisan dan penulisan. Setakat ini baginda telah menulis empat buku berbahasa

Melayu untuk kanak-kanak.

Baginda pernah dianugerahkan penulis buku terbaik bagi kategori kanak-kanak anjuran Kementerian Pendidikan dan kini menjadi penyumbang kepada satu ruangan tetap di akhbar *New Straits Times*.

Baginda juga aktif dalam kerja amal dan menjadi Timbalan Presiden Majlis Wanita Johor (Mawar) dan Presiden Persatuan Pandu Puteri Johor.

Hasil perkahwinan baginda dengan Tunku Ibrahim Ismail, baginda dikurniakan empat putera dan seorang puteri. - Bernama